

**Ni Presidente
Henry B. Eyring**
Umuna a Mammagbaga iti
Umuna a Pangulu



Ti Timek ti Apo

Ti Doktrina ken Katulagan ket awisenna ti amin a tao iti amin a lugar tapno dumnggeg iti timek ni Apo Jesucristo (kitaen iti DkK 1:2, 4, 11, 34; 25:16). Napno daytoy kadagiti mensahe, ballaag, ken makaparegta a balakadna a naited babaen ti paltiing kadagiti napili a propeta. Kadagito y a paltiing makitatayo no kasano a masungbatan ti Dios dagiti kararagtagayo ti pammati nga addaan kadagiti mensahe ti pammilin, talna, ken ballaag.

Kadagiti kararagtagayo kalikagumantayo nga ammuen no ania koma ti paaramid ti Dios kadatayo, no ania ti nasken nga aramidentayo tapno masarakan ti talna ken ragsak iti daytoy a biag ken kalpasanna, no ania ti agur-uray kadatayo. Napno ti Doktrina ken Katulagan kadagiti sungbat iti kakasta a saludsod a dinamag dagiti ordinario a tao ken dagiti propeta iti napakumbaba a kararag. Mabalina a napateg daytoy a pangiwawan a mangisuro kadatayo no kasano ti panangawat iti sungbat kadagiti saludsod maipapan iti temporal a pagsayaa-tan ken agnanayon a pannakaisalakan.

Ti panagpakumbaba ken pammati ken ni Apo Jesucristo ket isu dagito y ti tulbek. Inawat ni Oliver Cowdery ti sungbat manipud iti Apo maipanggep iti tarigagayna a tumulong iti pannakaipatarus ti Libro ni Mormon: “Laglagipem nga awan ti maaramidam no awan ti pammati; ngarud agdawatka babaen iti pammati. Dimo tagibassiten dagito y a banag; dimo dawaten dayta saan a nasken” (DkK 8:10).

Nadagdagullit iti Doktrina ken Katulagan, nga idawat ti Apo a kasapulan ti pammati ken panagpakumbaba sakbay nga itedna ti tulongna. Maysa a gapu iti daytoy ket saan a mabalina nga umay dagiti sungbatna iti wagas a namnamaentayo. Kasta met a saanda a kanayon a nalaka a maawat.

Ipakita ti pakasaritaan ti Simbaan ken ti padpadas dagiti kapuonantayo daytoy a kinapudno. Nagkararag a sipapasnek idi ni lelongko iti tumeng a ni Henry Eyring tapno ammuenna no ania ti nasken nga aramidenna idi nangngegna ti naisubli nga ebanghelio a naisuro idi 1855. Immay ti sungbat iti maysa a tagtagainep.

Natagtagainepna a nakatugaw kano iti sango ti maysa a lamisaan a kaabayna ni Elder Erastus Snow ti Korum dagiti Sangapulo-ket-dua nga Apostol ken ti maysa nga elder nga agnagan iti William Brown. Insuro ni Elder Snow dagiti pagbatayan ti ebanghelio iti uneg ti kasla maysa nga oras. Kalpasanna kinuna ni Elder Snow, “Iti nagan ni Jesucristo bilinenka nga agpabuniag ket daytoy a lalaki [ni Elder Brown] . . . ti mangbuniagto kenka.”¹ Agyaman ti pamiliak gapu ta adda pammati ken pakumbaba ni Henry Eyring nga agpabuniag ken ni Elder Brown, iti alas 7:30 iti bigat iti maysa a pagdigu-san ti naurnong a tudo iti St. Louis, Missouri, USA.

Saan nga immay ti sungbat iti kararagna iti maysa a mangngeg a timek nga aggapu iti Apo. Immay daytoy iti maysa a parmata ken tagtagainep iti rabii, kas iti naaramid ken ni Lehi (kitaen iti 1 Nephi 8:2).

Insuro ti Apo kadatayo a mabalin pay nga umay dagiti sungbat kas panagrikna. Iti Doktrina ken Katulagan, insurona ni Oliver Cowdery, “Adtoy, ibagak kenka iti panunotmo ken iti pusom, babaen ti Espiritu Santo, ti dumteng kenka ken agnaed iti pusom” (DkK 8:2).

Ket pinaregtana ni Oliver iti kastoy: “Diak kadi imbaga ti kappia iti panunotmo maipanggep iti dayta a banag? Ania pay ti nain-indaklan a saksi a magun-odmo ngem ti aggapu iti Dios?” (DkK 6:23).

Ti Doktrina ken Katulagan, pakasaritaan ti Simbaan, ken ti pakasaritaan nga indulin ni Henry Eyring iti misionna kalpasan laeng ti panagbuniagna ket nakaisuro kaniak a mabalin a marikna dagiti sungbat kas ballaag kasta met a kas kappia.

Idi Abril 1857, ni Elder Parley P. Pratt ti Korum dagiti Sangapulo-ket-dua nga Apostol ket dimmar-ay iti maysa a komperensia iti maawagan itan iti Oklahoma, USA. Insurat idi ni Henry Eyring a ni Elder Pratt ket “napnuan ti panunotna kadagiti makapaledaang a bambanag . . . , saanna a kabaelan ti mangilasin iti masakbayan wenno ania man a wagas tapno makaruk-at.”² Insurat a dagus ni Henry dagiti naliday a damag kalpasan laeng ti pannakapapatay ti Apostol. Intultuloy ni Elder Pratt ti panagdaliasatna iti baet dagiti nariknana a peggad, kas met laeng iti inaramid ni Propeta Joseph idi mapan iti Carthage.

Daytoy ti pammaneknekk a kanayon a sungbatan ti Apo ti napakumbaba a kararag nga addaan pammati. Ti Doktrina ken Katulagan ken ti bukodtayo a padas ket mangisuro kadatayo no kasano a mailasin dagita a sungbat ken maawatda iti pammati, pangiturong, pammatalged iti kinapudno, wenno pammallaag man dagitoy. Ikararagko ta sapay koma ta kanayon a dumngeg ken mailasintayo ti managayat a timek ti Apo.

DAGITI NAGADAWAN

1. “The Journal of Henry Eyring: 1835–1902” (saan pay a naipablaak a manuskrito nga adda iti panagtagikua ti nagsurat).
2. “The Journal of Henry Eyring: 1835–1902.”

PANANGISURO MANIPUD ITI DAYTOY A MENSAHE

1. Basaenyo nga aggigiddan dagiti parapo maipapan iti kararag iti daytoy a mensahe. Bayat ti panagbasayo, dawatenyo kadagiti miembro ti familia a dumngegda a nasayaat no kasano a sungbatan ti Dios dagiti kararag. Paneknekanyo maipapan iti kinapateg ti panagkararag.

2. Napno ti Doktrina ken Katulagan kadagiti sungbat iti kakasta a saludsod a dinamag dagiti tao iti kararag. Ania ngata no saan iti kaano man nairekord dagiti sungbat kadagiti saludsodda (dagiti paltiing)? Allukoyenyo ti familia a mangsursuro a mangilasin ken mangsurot kadagiti parikna ti Espiritu. Mabalin a kayatda nga isurat dagiti kapanunotanda maipanggep iti kararag kadagiti diurnalda.

AGTUTUBO

Panangdenggeg kadagiti Parikna

Ni María Isabel Molina

Maysa a rabii nagtalaw ti ubing a kasinsinko manipud iti pagtaengan, isu a nagdardarasak a napan nangsapul kenkuana. Bayat ti panagmanehok, inkararagko a tulongannak ti Espiritu. Ammok a sungbatan ken iturongnak ti Dios, ket inkarigatak ti dumngeg kadagiti parikna ti Espiritu. Ngem idi awan ti mangngegko, nariknak ti pannakaupay ket nariknak a saannak a pinariknaan ti Espiritu.

Nupay kayatko ti umadayo tapno agsapul pay, nariknak a nasken nga agtalinaedak iti lugar iti lawlaw ti pagtaengan ti kasinsinko. Isu nga inkeddengko ti agmaneho manen a manglawlaw iti lugar. Idi agsardengak iti pagballasiwan, nakitak ti anniniwan ti maysa nga ubing a babai a magmagna. Nasarakakon ti kasinsinko!

Iti iruruarko iti kotse ken panagtarayko nga umasiddeg kenkuana, naamirisko nga iturturongnak ti Espiritu laeng babaen ti panangtulongna a mariknak a nasken nga agtalinaedak iti dayta met la a lugar. Gapu ta dumngegak iti naulimek a timek, dumani diak impangag dagiti parikna ti Espiritu. Naawatak kalpasanna nga iti adu a gundaway a saantayto a mangngegan ti maysa a timek, ngem mariknatayto dagiti parikna iti puspustayo.

Agyamanak unay iti pannarabay ti Espiritu. Pudno nga isu ket kanayon nga adda idiy! Kas iti kuna dagiti nasantuan a kasuratan, “Ti koma Espiritu Santo ti kanayon a kaduam” DkK 121:46).

No maikaritayo iti pannarabay ti Espiritu ket mangikasotayo, makapagbalintayo a ramit kadagiti ima ti Dios nga agaramid iti nasayaat kadagiti adu a tattao. Babaen iti kanayon a panangkadkadua ti Espiritu, ammotayto ti dalan a nasken a papanantayo.

Maysa a Padas iti Kararag

Isuro ni Presidente Eyring a mabalin a masungbatan kadagiti kararag iti adu nga agduduma a wagas. Mabalina a maddaankayo iti padas a panagsukisok kadagiti nasantuan a kasuratan tapno maammuan ti sumagmamano kadagita a wagas.

Kitaenyo ti tunggal nasantuan a kasuratan iti baba. Iti diurnalyo, mangisuratkayo iti sumagmamano a

balikas a mangiladawan no ania ti kuna dagitoy nasantuan a kasuratan maipapan kadagiti sungbat iti kararag.

Mabalinyo pay nga isurat iti diurnalyo maipapan kadagiti bukodyo a padas kadagiti kararag a masungsungbatan.

Juan 14:26

Doktrina ken Katulagan 6:22–23

Doktrina ken Katulagan 8:2

Doktrina ken Katulagan 9:8–9

Proverbios 8:10–11



Pammati, Pamilia, Tulong

Aramid ti Misionario

Sikakararag nga adalenyoy daytoy a material ken, no maitutop, ilawlawagyo daytoy kadagiti kakabsat a babbai a sarungkaranyo. Usarenyo dagiti saludsod a mangtulong kadakayo a mangpapigsa kadagiti kakabsatyo a babbai ken mangaramid iti Relief Society nga aktibo a paset iti bukodyo a biag.

Maibaon dagiti Santo iti Ud-udina nga Aldaw “nga agrabaho iti bangkag [ti Apo] para iti pannakaisalakan dagiti kararua dagiti tao” (DkK 138:56), a pakaibilangan ti aramid ti misionario. Ditay kasapulan ti pormal nga awag nga agmision tapno mangibinglay iti ebanghelio. Ti biag dagiti dadduma ket paraburanto ti ebanghelio nga adda iti aglawlawtayo, ken no isaganatayo ti bagitayo, usarennatayonto ti Apo. Mabalin nga awaten dagiti visiting teacher dagiti naespirituan a pagrebbenganda ket tumulongda a “mangipatungpal iti saan nga ipapatay ken ti agnanayon a biag ti tao” (Moises 1:39).

Idi binukel ni Propeta Joseph Smith ti Relief Society idi 1842, kinunana a dagiti babbai ket saanda laeng a mangaywan kadagiti napanglaw ngem ketdi mangisalakanda pay kadagiti kararua.¹ Daytoy pay laeng ti panggeptayo.

“Ti Apo . . . mangitalek iti pammaneknek maipapan ti kinapudno kadagitay mangiburayto iti daytoy kadagiti sabali,” kinuna ni Presidente Dieter F. Uchtdorf, Maikadua a Mammagbaga iti Umuna a Panguluen. “Nangruna pay, a namnamaen ti Apo kadagiti miembro ti Simbaanna nga ‘ungapen[da] ti [ngiwatda] iti amin nga oras, iti

panangipakdaarda iti ebanghelio[na] iti timek a mangidirdir-i’ (DkK 28:16). . . . No dadduma ti maysa a binatog ti pammaneknek ket mabalin a mangituding kadagiti pasamak a mapagteng tapno mangaring iti biag ti maysa a tao para iti kinaagnanayon.”²

Manipud kadagiti Nasantuan a Kasuratan

Doktrina ken Katulagan 1:20–23; 18:15; 123:12

Manipud iti Pakasaritaantayo

Ti estoria maipapan ken ni Olga Kovářová iti sigud a Czechoslovakia ket maysa a padas ti miembro a misionario manipud iti pakasaritaan ti Relief Society. Kadagiti umuna a tawen ti 1970, nagadal iti kina-doktor ni Olga ken nagtarigagay iti naun-uneg pay a naespirituan a biag. Nadlawna ti 75 ti tawenna a ni Otakar Vojkůvka, maysa a Santo iti Ud-udina nga Aldaw. “Para kaniak pitupulo-ket-lima ti tawenna ngem ti pusona kasla asideg iti sangapulo-ket-walo ti tawenna ken napnuan iti rag-o,” kinunana. “Karkarna unay daytoy iti Czechoslovakia iti dayta a panawen ti sinisismo.”

Sinaludsod ni Olga ken ni Otakar ken ti pamiliana no kasano a nasarakanda ti rag-o. Inyam-ammoda

kenkuana dagiti dadduma pay a miembro ti Simbaan ken inikkanda isuna iti Libro ni Mormon. Sigagagar a binasana daytoy ket nabuniagan ken nakumpirmaan iti nabiit. Manipud iti dayta a kanito naimpluensiaan ni Olga iti nasayaat iti maysa a lubong nga adda pannakaidadanes gapu iti politika ken pannakairurumen gapu iti relihion. Nagserbi isuna a kas presidente ti Relief Society iti bassit a branchna ken timmulong a nangisalakanda dagiti kararua dagiti sabali babaen ti panangyegna kada-kuada ken ni Cristo.³

DAGITI NAGADAWAN

1. Kitaen iti *Teachings of Presidents of the Church: Joseph Smith* (2007), 453.
2. Dieter F. Uchtdorf, “Waiting on the Road to Damascus,” *Liahona*, Mayo 2011, 76–77.
3. Kitaen iti *Daughters in My Kingdom: The History and Work of Relief Society* (2011), 92–95.

Ania ti Maaramidko?

1. Sursurotek kadi dagiti parikna ti Espiritu Santo bayat ti panangiburayko iti pammanekneko kadagiti kakabsatko a babbai a sarsarungkarak?
2. Kasano a tultulongak dagiti kakabsat a babbai nga ay-aywanak tapno makasursuro iti ebanghelio?

Para iti ad-adu pay nga impormasion, mapan iti reliefsociety.lds.org.